



## RADIOCRONICHIS PAR FURLAN: ROBIS DI ... CRODII PARDABON

Ducj a san che il Stadi Friül al sepi “fevelà” par furlan: il sproc “La passion e je la nestre fuarce” che si lei sot dai Skybox e cheste pagine dentri di “Udinese Magazine”, a son une buine dimostrazion des azions dal Protocol di Intese tra ARLeF - Agenzie Regionâl pe Lenghe Furlane, Udinese Calcio Spa e Comun di Udin, firmât juste apont par doprà simpri di plui la nestre lenghe tal stadi.

Provait a imagjinâ un Stadi Friül che al “feveli” pardabon la lenghe doprade de plui part dai tifôs, chê lenghe che e veicole il leam strent che i tifôs a àn cul lôr teritori e la lôr scuarde dal cûr. Un stadi che al “feveli” cussì a fuart e a clâr che si rive a sintilu ancje dal difûs des tribunis, di rivâ a jessi dongje ancje a chei che no rivin a gjoldi di persone des sghiribicadis, des batudis dal cjanton, dai cuintripits des scuadris tal cjamp di balon.

Nol covente pensâ a dilunc. Il tifôs scoltadôr al sa che la imagjinazion in chest câs no covente.

Baste tornâ indaûr tal timp resint e rivâ a domenie ai 3 di Avost dal 2016 cuant che lis radios impiadis sui 90.0 a trasmetin in direte dal Stadi Friül: *“Un salût a dutis lis scoltadoras e a ducj scoltadôrs di Radio Onde Furlane. O fevelin in direte dal cjamp di balon dal Stadi Friül pe partide internazionâl in amicizie tra l’Udin e il Middlesbrough...”*

Une altre esperienze di croniche sportive in direte radio e sui spalts e je chê dai 7 di



Novembar dal 2015, in ocasion de scree dal cjamp di balon di Remanzâs fûr par fûr bilengâl (furlan e talian). Vie pe partide jenfri ASD Aurora Buonacquisto e ASD Terzo Calcio, lis cassis audio a sparniçavin la vôs di Gianfranco Cinello e di Enrico Turloni che a comentavin il lâ indevant de partide, cun Claudio Moretti che al intervistave i tifôs.

Dut, in direte radio.

Ma no finis ca la lungje liste di radiocronichis par furlan. Di fat la ARLeF e à finanziât il proget “RadioAtive” di Radio Onde Furlane che al veve tra lis azions previodudis ancje chê di trasmeti transmissions dedicadis al sport, par esempli “Sghiribicilu”, e radiocronichis in direte tant che chês de:

- partide di scree dai Campionâts europeans feminins under 16 di bale tal zei tra Serbie e Lituania, zuiade a Udin ai 6 di Avost dal 2016;
- partide dai Campionâts europeans feminins under 16 di bale tal zei tra Italie e Spagne, zuiade a Udin ai 9 di Avost dal 2016;
- partide di balon dal Campionât dai diletants di prime categorie tra Serenissima Pradamano e Union Martignacco, zuiade ai 15 di Otubar dal 2016 a Pradaman che e je stade trasmetude la radiocroniche in direte di Francesco Tonizzo e di Enrico Turloni, e in direte streaming su FVG Sport Channel;
- partide di balon dal Campionât feminin di serie A tra Tavagnà e San Zaccaria - Romagna, zuiade a Tavagnà ai 29 di Otubar dal 2016.

Une schirie di esemplis impuartants dai ultins agns che dal sigûr a rindin braurôs i tifôs furlans.

Che e sedi rivade la ore di tornâ a fâ “fevelà” il Stadi Friül par furlan, a plene vôs, fûr e dentri dal teren di zûc? Ce disêso?